

WILL of GOD 316

Unsaon Nako Pagkahibalo sa Kabubut-on sa Dios?

"Ayaw kamo pagpahiuyon sa pamatasan niining panahona. Ipabag-o hinuon sa Dios ang inyong kaugalingon pinaagi sa pagbag-o sa inyong panghunahuna aron masayran ninyo ang kabubut-on sa Dios—unsay maayo, hingpit ug makapahimuot kaniya." Roma 12:2

Ang pagkahibalo ug pagbuhat sa kabubut-on sa Dios importante kaayo. Sunda si Jesus. Miingon siya nga mianhi siya sa kalibutan, *"Dili sa pagbuhat sa akong kaugalingong kabubut-on, kondili sa kabubut-on niya nga nagpadala kanako."* Juan 6:38. Ang dako nga bahin sa kabubut-on sa Dios magamit sa tanang Magtutuo sa samang paagi. Apan ang Dios adunay personal nga kabubut-on alang sa Mga Magtutuo nga hinay-hinay Niyang ipadayag samtang motubo ka sa imong paglakaw uban Kaniya diha sa adlaw-adlaw nga pagkamatimuman. Mahibaloan nimo ang kabubut-on sa Dios. Hatagan ka Niya ug pagsabot. *"Salig sa Ginoo sa bug-os mong kasingkasing. Ayaw gayod pagsalig sa imong kaalam. Hinumdomi siya sa tanan mong buhaton ug tultolan ka niya sa matarong nga dalan."* Panultihon 3:5-6. Mahibaloan nimo ang kinatibuk-ang kabubut-on sa Dios alang sa tanang Magtutuo gikan sa Biblia. Mahibaloan nimo ang Iyang personal nga kabubut-on ingon nga usa ka kombinasyon sa Iyang Pulong ug sa matimuman ug masinugtanon nga kinabuhi nga dili mosupak niini. Gikan nianang basehan sa pagkamasinugtanon, mahimo nimong maila ug matuman ang Iyang kabubut-on alang kanimo. Pangayo sa Amahan. Pangitaa ang giya gikan sa Iyang Pulong, Iyang kaalam, Iyang katawhan, ug Iyang kalinaw. Sa panahon nga mahibaloan nimo ang kabubut-on sa Dios, tumana Siya.

ANG KINATIBUK-ANG KABUBUT-ON SA DIOS. Sagad sa kinatibuk-ang kabubut-on sa Dios makita sa mga sugo, mga prinsipyo, ug mga pananglitan sa Biblia. Ang Biblia mao ang pangunang tinubdan sa pagkahibalo sa kabubut-on sa Dios alang sa imong kinabuhi. *"Ang imong pulong maoy suga nga magtultol kanako ug maoy kahayag sa akong agianan."* Salmo 119:105.

1. Mga sugo. Daghan ang mga sugo sa Biblia nga alang sa tanang Magtutuo sama sa, *"Pagmalipayon kamo kanunay. Pag-ampo sa tanang panahon ug pagpasalamat kamo bisag unsay modangat kaninyo. Kini mao ang kabubut-on sa Dios nga buhaton ninyo sa ngalan ni Cristo Jesus."* 1 Tesalonica 5:16-18. Ug *"Gusto sa Dios nga magmaputli kamo pinaagi sa hingpit nga paglikay sa imoralidad."* 1 Tesalonica 4:3. Miingon si Jesus, *"Kon nahigugma kamo kanako, tumana ninyo ang akong mga sugo."* Juan 14:15. Sabta ang konteksto sa mga sugo. Gisugo sa Dios si Noe nga maghimo ug arka, Genesis 6:14. Wala ka sugoa sa Dios nga buhaton kana. Gisugo sa Dios si David nga moadto sa Hebron, 2 Samuel 2:1. Wala ka sugoa sa Dios nga buhaton kana. Ayaw kuhaa ang usa ka sugo gawas sa iyang konteksto.

2. Mga prinsipyo. Adunay mga prinsipyo sa Biblia nga imong sundon. Ang prinsipyo sa maayong pagdumala makita sa Lucas 16:1-13. Ang bili sa pagkahimo ug disipulo makita sa kataposang bahin sa Lucas 14. Ang prinsipyo sa pagpangita sa mga nawala nga tawo makita sa tulo ka sambingay sa Lucas 15. Sunda kini ug ang uban pang mga prinsipyo sa Biblia.

3. Mga pananglitan. Ang mga sugo ug mga prinsipyo sa Biblia naghatag kanimo sa kinatibuk-ang kabubut-on sa Dios alang sa imong kinabuhi. Ang Biblia adunay mga pananglitan nga atong sundon. Ang labing maayo nga pananglitan mao ang kinabuhi ni Jesus. Human niya hugasi ang mga tiil sa mga disipulo, miingon si Jesus, *"Naghatag ako kaninyog panig-ingnan aron inyong buhaton ang gibuhay ko kaninyo."* Juan 13:15. Kinahanglan natong sundon ang Iyang pananglitan sa pagpaubos, Filipos 2:3-5. Kinahanglan nga molakaw kita sa Iyang mga lakang, *"Gitawag kamo sa Dios aron mag-antos kay si Cristo nag-antos man tungod kaninyo ug naghatag kaninyog panig-ingnan aron inyong sundon."* 1 Pedro 2:21. *"Mahibaloan nato nga nagkinabuhi kita sumala sa kabubut-on sa Dios pinaagi niini: ang nag-ingon nga siya anaa sa Dios kinahanglan magkinabuhi sama kang Jesu-Cristo."* 1 Juan 2:5-6.

USA KA PASIDAAN. Ang Dios dili mamakak, Salmo 119:160. Ang Dios dili mogiya kanimo, o mosulti kanimo, aron supakon sa Iyang Pulong. Si Jesus naghatag ug mga lider aron masangkap kita, Efeso 4:11-14. Apan adunay daghang mini nga magtutudlo, 2 Timoteo 4:3-4. Ayaw gayod pagtuo nga ang Dios nagsulti kanimo nga mosupakon ang Iyang Pulong. Dili kana buhaton sa Dios. Kon ang usa ka lider sa simbahan mosulti kanimo nga supakon ang Pulong sa Dios, kana usa ka mini nga pagtulon-an.

ANG PERSONAL NGA KABUBUT-ON SA DIOS. Ang Dios adunay personal nga kabubut-on alang sa Mga Magtutuo, Salmo 32:8, Panultihon 3:5-6. Tumana ang kinatibuk-ang kabubut-on sa Dios. Dayon, aron mahibaloan ang Iyang personal nga kabubut-on, pangayoa nga mainiton sa Dios nga ikaw sultihan Niya. Pangitaa ang Iyang tubag gikan sa Iyang Pulong, Iyang kaalam, Iyang katawhan, ug Iyang kalinaw.

Pangayo. Iampo ang pag-ampo ni David, *“Tudloi ako sa pagtuman sa imong kabubut-on.”* Salmo 143:10. Ang Apostol Pablo nag-ampo nga ang Mga Magtutuo sa Colosas *“masayod unta kamo sa iyang kabubut-on.”* Colosas 1:9. Ang imong kinasingkasing nga pag-ampo alang sa imong kaugalingon ug alang sa uban kinahanglan mao ang pagkahibalo ug pagbuhat sa kabubut-on sa Dios.

Pangitaa ang giya. Gipadayag sa Dios ang Iyang personal nga kabubut-on pinaagi sa Iyang Pulong, Iyang kaalam, Iyang katawhan, ug Iyang kalinaw. Pangayo sa Dios nga ipadayag Niya kanimo ang Iyang kabubut-on. Tubagon Niya ang imong mga pag-ampo pinaagi sa:

1. Iyang Pulong. Ang pagkahibalo sa personal nga kabubut-on sa Dios maoy resulta sa kanunay nga pagtuon sa Biblia. Ang kabubut-on sa Dios alang kanimo mahimong tin-aw samtang makabaton ka ug kaalam ug pagsabot gikan sa Iyang Pulong. Dili gayod ka Niya giyahan sa pagbuhat ug butang nga supak sa Iyang Pulong.

2. Iyang Kaalam. Ang kaalam sa Dios nagagikan sa espirituhanong pagkamasinugtanon, 1 Corinto 2:14-15. *“Ayaw kamo pagpahiyon sa pamatasan niining panahona. Ipabag-o hinuon sa Dios ang inyong kaugalingon pinaagi sa pagbag-o sa inyong panghunahuna aron masayran ninyo ang kabubut-on sa Dios—unsay maayo, hingpit ug makapahimuot kaniya.”* Roma 12:2. Pangayo sa Dios sa Iyang kaalam, *“Apan kon diha kaninyo may nakulangan ug kaalam, papangayoa siya sa Dios ... kay ang Dios mahinatagon.”* Santiago 1:5.

3. Iyang Katawhan. Ang katawhan sa Dios usa ka kapanguhaan sa pagsabot sa kabubut-on sa Dios. Kadtong hustong nagtudlo sa Iyang Pulong pinaagi sa pagsulti o pagsulat makatabang, Colosas 1:28. Maayo nga mangayo ug tambag gikan sa hamtong nga Mga Magtutuo. Maayong ideya ang labaw pa sa usa ka magtatambag, *“Kon walay makatambag kanimo, dili ka molampos, busa maayo gayod nga modawat ka tambag.”* Panultihon 15:22. Ang hamtong nga Mga Magtutuo dili hingpit, apan makahatag sila kanimo ug makahuluganon nga pagsabot aron makatabang kanimo sa pag-ila sa kabubut-on sa Dios.

4. Iyang Kalinaw. Ang kalinaw sa Dios mao ang kataposang pagpamatuod sa Iyang personal nga kabubut-on, *“Paharia sa inyong kasingkasing ang pakigdait nga gikan ni Cristo.”* Colosas 3:15. *“Ug ang kalinaw sa Dios nga dili matugkad sa tawo, manalipod sa inyong kasingkasing ug hunahuna diha sa inyong pagkahiusa kang Cristo Jesus.”* Filipos 4:7. Kini nga kalinaw mao ang lawom nga pagbati nga gihatag sa Dios nga husto ang usa ka desisyon human sa pag-ampo, pagtuon sa Biblia, espirituhanong kaalam, ug mga pagsabot gikan sa espirituhanong hamtong nga mga magtatambag. Pangitaa ug hulata ang Iyang kalinaw.

Lihok. Kon mangutana ka kon ang usa ka butang kabubut-on ba Niya, ang tubag mahimong “dili,” sama sa tubag kang Pablo, 2 Corinto 12:7-10. Mahimo usab kini nga “hulat.” Ang Iyang tubag nga “hulat” mahimong mosangpot sa dakong panalangin, Isaías 40:31. Kon ang tubag sa Dios “oo,” buhata ang Iyang kabubut-on bisan kon lisod, dili popular, o dako ug bili. Kinahanglan nga malipay kita sa pagbuhat sa Iyang kabubut-on gikan sa atong mga kasingkasing, Salmo 40:8, Efeso 6:5-6. Pagbantay sa peke nga mga tubag nga gitudlo sa ngalan sa Kristiyanismo. Tumana kon sigurado ka nga nahibalo ka sa kabubut-on sa Dios.

Unsaon Nako Pagkahibalo sa Kabubut-on sa Dios? © 2026 ni John D. Morris III gimantala sa Acts One Eight. Mahimo nimo kining i-print, kopyahon, i-post, i-email, o ipadala sa mensahe nga walay kausaban sa sulod ug uban niining bug-os nga pahayag. Mahimo nimong idugang ang ngalan o logo sa imong ministeryo o simbahan sa ibabaw sa unang pahina ug idugang ang imong impormasyon sa pagkontak ibabaw sa solidong linya duol sa ubos sa ikaduhang pahina. Ang WillofGod316.org gibase lamang sa Biblia. Anaa kini aron tabangan ang Mga Magtutuo nga madiskobrehan ang kabubut-on sa Dios. Mahimo kang mo-email sa Acts One Eight (sa Iningles kon mahimo) ngadto sa: Hello@Mail316.org. Ang mga serbisyo sa paghubad gihatag sa www.ChristianLingua.com. Ang *Unsaon Nako Pagkahibalo sa Kabubut-on sa Dios?* anaa sa kwarantay otso ka pinulongan nga libre sa www.WillofGod316.org. Ang mga kinutlo sa Biblia sa Iningles nga bersyon gikan sa New American Standard Bible 1995 sa The Lockman Foundation. Ang mga kinutlo sa Biblia niini nga hubad gikan sa Iningles nga bersyon sa New American Standard Bible 1995 sa The Lockman Foundation. Ang mga kinutlo sa Biblia niini nga hubad gikan sa